

आकाशवाणी

खास-खास खबरां:-

1. पच्छिम बंगाल च असेम्बली चुनाएं दे दूए ते अखीरले गेड़ लेई प्रचार अज्ज संज्ञा मुक्की जाहग।
2. चुनां आयोग नै पच्छिम बंगाल च दूए गेड़ दे असेम्बली चुनाएं लेई बड़ी सख्त सुरक्षा योजना दा ऐलान कीता ऐ।
3. गृह मंत्रालय दे निर्देशें मगरा राश्ट्रीय जांच एजेंसी नै विधानसभा चुना आले पच्छिम बंगाल च 79 देसी बम्ब बरामद होने दे सरबंध्य च जांच लेई मामला दर्ज करी लैता ऐ।
4. प्रधानमंत्री नरेन्द्र मोदी सिक्किम दे दंऊ दिनें दे दौरे लेई अज्ज गंगटोक पुज्जा करदे न।
5. भारत ते न्यूजीलैंड अपने आर्थिक सरबंध्यें गी मजबूत करने दे मकसद कन्नै अज्ज नमीं दिल्ली च मुक्त बपार समझौते पर दस्तख्त करगंन।
6. IPL क्रिकेट च कल रातीं लखनऊ च खेड़े गेदे सुपर ओवर आले इक रोमांचक मुकाबले च कोलकाता नाइट राईडर्स नै लखनऊ सुपर जायंट्स गी शिकस्त देई दिती।

<><><><><><>

WB –Campaigning

पच्छिम बंगाल च विधानसभा चुनां दे दूए ते खीरले गेड़ लेई चुनां प्रचार अज्ज संज्ञा मुक्की जाहग। दूए गेड़ च 29 अप्रैल गी राज्य दिएं 143 विधानसभा सीटें लेई वोट पोआए जागंन। इनें विधानसभा हलके च उत्तर कोलकाता- दक्खन कोलकाता- हवाड़ा-

नादियां- उत्तर 24 परगना- दक्खन 24 परगना- हुगली ते पूर्वी बर्धमान सनें 8 चुनावी जिले शामिल न। अज्ज प्रचार दे खीरी रोज रैलियां- रोड शो ते जनसभाएं राएं बक्ख- बक्ख पार्टियें दे नेता ते स्टॉर प्रचारक मते शा मते मतदाताएं गी अपने हक्कै च करने लेई अपनी पूरी टिल्ल लागन- तां जे चुनां च बनी दी जबरदस्त टक्कर आहली स्थिति च उनें'गी जित हासल होई सकै। बी.जे.पी. दे सीनियर लीडर ते प्रधानमंत्री नरेन्द्र मोदी अज्ज जगतदल दे जिलेपी भट्ठ च जनसभा गी सम्बोधित करगंन- जिसलै जे तृममूल कांग्रेस दी प्रधान ते मुख्मन्त्री ममता बैनर्जी हुंदा अज्ज जादवपुर ते टॉलीगंज विधानसभा हलके च प्रचार लेई जाने दा कार्यक्रम ऐ। एहदे शा पैहले-पैहले गेड़ तैहत होए दे मतदान दौरान 23 अप्रैल गी 93 प्रतिशत कोला मते मतदाताएं वोट पाने दे अपने अधिकार दा इस्तमाल कीता हा। वोटें दी गिनतरी 4 मई गी होग। उससै रोज केरल- असम- तमिलाडू ते पुदुचेरी च होए दे विधानसभा चुनां दे वोटें दी गिनतरी बी कीती जाहग।

<><><><><><>

EC- WB Polls

भारतीय चुनां आयोग नै पच्छिम बंगाल विधान सभा चुनां दे दुए गेड़ दी पछोकड़ै च निग्गर सुरक्षा बंदोबस्तें दी घोषणा कीती ऐ। आयोग नै आखेआ ऐ कि मतदान प्रक्रिया च विघ्न पाने- जा मतदाताएं गी डराने-धमकाने दी कुसै बी कोशश कन्नै सख्ती नै निबड़ेया जाहग। आयोग नै सुरक्षाबलें गी निर्देश दिता ऐ कि ओह चुनां हलकें साबबै जकीनी बनान ते अंदरलियें गैलियें ते संवेदशील इलाकें च सुरक्षाबलें दी लोड़चदी गिनतरी च तैनाती दी बी पक्की बवस्था करन- तां जे मतदाता बिजन कुसै डर-त्राह जां

असुविधा दे वोट पाने दे अपने अधिकार दा इस्तमाल करी सकन। कोलकाता दे तैहत औने आहले त्रौने चुनावी जिले दे अधिकारिं- पुलसै दे बड्डे अफसरें ते केन्द्री बलें दे कमांडरें कन्नै होई दी उच्ची सतह दी बैठक च अतरु 29 अप्रैल गी होने आहले मतदान लेई सब्भनें तयारियें दी समीक्षा कीती गई। राज्य दे मुख चुनां अधिकारी मनोज कुमार अग्रवाल होरें दक्खन 24 परगना दा दौरा लाने परैन्त दस्सेया जे हर इक पोलिंग बूथ पर CCTV कैमरे लाए जागंन- सब्भनें मतदान केन्द्रें ते बूथें पर CCTV कैमरे लाए जा'रदे न ते मतदान केन्द्र दे 100 मीटर दे दायरे च ऐसी कुसै व्यक्ति गी औने दी इजाजत नैई होग जेहदे कश उत्थै जाने लेई इख्तयार नैई होऐ।

<><><><><><>

NIA -West Bangal

राश्ट्रीय जांच एजेंसी NIA नै पच्छिम बंगाल च 79 देसी बम्बें दी बरामदगी आहले मामले च जांच गितै मामला दर्ज कीता ऐ। NIA प्रवक्ता नै आखेआ ऐ कि गृह मंत्रालय दे हुकमै दी पालमा करदे होई आतंकवाद रोधी एजेंसी नै मामला दर्ज कीता ऐ। एहदे शा पैहले चुनां आयोग नै पच्छिम बंगाल पुलस गी चुनां आहले राज्य च देसी बम्ब गैर कनूनी तौरा पर तयार करने दे कम्मै च शामिल लोकें गी गिरफ्तार करने लेई इक विशेष अभियान चलाने दा निर्देश दिता हा। एह निर्देश तंदू जारी कीता गेआ- जंदू पुलसै दक्खन 24 परगना जिले दे भांगर च इक आदमी दे घरा बड़ी बद्द गिनतरी च देसी बम्ब बरामद कीते हे- जेहड़ा कथित तौरा पर तृममूल कांग्रेस दा कार्यकर्ता हा।

<><><><><><>

Doval UAE

राष्ट्रीय सुरक्षा सलाहकार अजीत डोभाल होरें कल संयुक्त अरब अमीरात दे राष्ट्रपति मोहम्मद बिन ज़ायद अल नाहयान हुंदे कन्नै मलाटी कीती ते व्यापक सामरिक सांझ-भ्याली गी होर निग्गर बनाने दे उपाएं पर चर्चा कीती। संयुक्त अरब अमीरात च भारतीय दूतावास नै आखेआ ऐ जे डोभाल होरें प्रधानमंत्री नरेन्द्र मोदी हुंदे आसेया अरब मुख्य दे अपने सरकारी दौरे दौरान संयुक्त अरब अमीरात दे शीर्ष नेता होरेंगी मुबारकबाद दिती ऐ। इक सोशल मीडिया पोस्ट च भारतीय दूतावास नै आखेआ ऐ जे व्यापक सामरिक सांझ-भ्याली गी होर निग्गर बनाने दे उपाएं- इलाकाई हालात ते आपसी हित दे होरनें मुददें पर चर्चा कीती गई। इस महीने दे शुरू च डोभाल होरें सऊदी अरब दे सीनियर लीडरें कन्नै मलाटी कीती ही ते दपक्खी सरबंद्धे- इलाकाई हालात ते आपसी हितें दे होरनें क्षेत्रें पर चर्चा कीती ही।

<><><><><><>

PM -Sikkim

प्रधानमंत्री नरेन्द्र मोदी होर अज्जै थमां दंऊ दिनें दे सिक्कम दौरे पर रौहगंन। अज्ज उन्दा सिक्कम च बिरलू द्वार थमां एम.जी मार्ग धोड़ी रोड शो करने दा कार्यक्रम ऐ। कल प्रधानमंत्री होर सिक्कम दे राज्य बनने दे 50 बरे पूरे होने दे सिलसिले च पालजोर स्टेडियम च आयोजित समापन समारोह च शामिल होगंन- जित्थे ओ राज्य च 4 ज्हार करोड़ रपे कोला मती लागत आहलियें कैई विकास परियोजनाएं च किश दा उदघाटन करगंन ते कैइएं दा नीह पत्थर रखगंन जिंदे च- बुनियादी ढांचे- सिड़क राबते- सेहत सेवाएं- शिक्षा- बिजली-राई-बाई- शैहरी विकास- पर्यावरण- सैलसफा ते होर

कैई क्षेत्रें दे मतल्लक परियोजना शामिल न। इस मौके पर सिक्कम सरकार एकता दे इक जहार कदम विषय पर इक बड़डा सांस्कृतिक कार्यक्रम बी पेश करोग- जेहदे च लगभग डेढ़ जहार कलाकार हिस्सा लैगंन।

<><><><><><>

Prez -H.P

राश्ट्रुति द्रौपदी मुरमू होर अज्जै थमां 5एं दिनें दे हिमाचल दौरे पर जा'रदियां न। कल ओ शिमला दे लोक भवन च हिमाचल प्रदेश दे उपराज्यपाल हुंदे आसेआ उन्दे सम्मान च दिती जाने आहली रातीं दी धाम च शामिल होगंन। बुधवारें राष्ट्रपति मुरमू होर अटल सुरंग दा दौरा करगंन ते वीरवारें पालमपुर स्थित चौधरी सरवन कुमार हिमाचल प्रदेश एग्रीकल्चर युनिवर्सिटी दे दीक्षांत समारोह च हिस्सा लैगंन।

<><><><><><>

Goyal -FTA

भारत ते न्यूजीलैंड बश्कार अज्ज नमीं दिल्ली च मुक्त बपार समझौते पर दस्तखत करगंन। इस बारे जानकारी सांझी करदे होई केन्द्र उद्योग ते बपार मंत्री पीयूष गोयल होरें आखेआ ऐ कि एह समझौते दौनें मुल्खे बश्कार आर्थिक सरबंधें गी होर निग्गर बनाने आहली भेठा इक महत्वपूर्ण गें होग। कल न्यूजीलैंड दे बपार ते निवेश मंत्री टॉड मैकक्ले हुंदे कन्नै आगरा च ताजमैहल दे दौरे दौरान पीयूष गोयल होरें आखेआ कि इस मुक्त बपार समझौते पर सैहमती कैई बरे धोड़ी चली दिएं उच्ची सतह दिएं बैठकें

दे बाद बनी ऐ। मेद ऐ जे इस बपार समझौते कन्ने ओंदे 5एं बरे च भारत ते न्यूजीलैंड बशकार दपक्खिया बपार दूना होइयै 5 Billion डॉलर तगर पुज्जी जाहग।

<><><><><><>

Bhopal Emergency Landing

178 जनै गी लेइयै मुम्बई थमां भोपाल जा'रदी एयर इंडिया दी इक डोआरी गी तकनीकी खराबी दे चलदे कल मध्य प्रदेश दी राजधानी भोपाल च एमरजेंसी लैंडिंग करनी पेई। ब्हाई अड्डे दे इक अधिकारी नै दस्सेआ ऐ जे एह जहाज दपैहरी 3 बज्जियै 20एं मिंटे पर भोपाल ब्हाई अड्डे पर सुरक्षित उतरी गेआ। जहाज च आई दी तकनीकी खराबी करी भोपाल थमां मुम्बई ओने आहली 178 यात्रिणं दी वापसी दी डोआरी रद्द करी दिती गई। भोपाल ब्हाई अड्डे नै दस्सेआ ऐ जे एयर इंडिया दी डोआरी AI-633 ने मुम्बई थमां भोपाल जा'रदी डोआरी दौरान एयर ट्रैफिक कंट्रोल गी तकनीकी खराबी दी सूचना दिती ही। सुरक्षा सरबन्धी सब्भै नियम तुरत लागू करी दिते गे ते ए.टी.सी एयरलाईन्स ग्राउंड आप्रेशन- CISF ते भोपाल ब्हाई अड्डे दी अगग दे बचाव टीम बशकार रमानदारी यकीनी बनाया गेआ।

<><><><><><>

IPL

IPL क्रिकेट च कोलकाता नाइट राइडर्स नै कल रातीं लखनऊ दे इकाना स्टेडियम च सुपर ओवरें दे रोमांचक मुकाबले च लखनऊ सुपर जायंट्स गी रहाई दिता। कोलकाता नाइट राइडर्स आसेया दिते गेदे 156 रन्ज दे लक्ष्य दा पिच्छा करदे होई लखनऊ सुपर जायंट्स दी टीम निर्धारित 20एं ओवरें च 8 विकेटां मुहाइयै 155 रन्ज गै बनाई सकी।

एहदे मगरा होए दे सुपर ओवर च लखनऊ सुपर जायंट्स छड़ा 1 रन्ज गै बनाई सकी
कीजे उन्नै अपनियां दौनें विकेटां मुहाई दितियां।

<><><><><><>